

**II. ATALA****BIZKAIKO LURRALDE HISTORIKOKO TOKI ADMINISTRAZIOA****Bermeoko Udala**

2020ko irailaren 25ean, Bermeoko Udaleko Osoko Bilkurak onartutako Bermeoko Udaleko lehentasunak, zeremonia eta protokoloa arautzen dauzan udal ordenantzaren aldaketan behin-betiko onspena.

**BERMEOKO UDALEKO LEHENTASUNAK, ZEREMONIA
ETA PROTOKOLOA ARAUTZEN DAUZAN UDAL ORDENANTZEA****I. TITULUA****ATARIKO XEDAPENA****1. artikulua**

Araudi honek Bermeoko udalerrian egiten diran ekitaldi ofizialetan agintari publikoen lehentasunen araubidea eta hurrenkerea arautzen dauz, baita hareetan kontuan izan behar diran zeremoniala eta protokoloa be.

Udala korporazino, alkarte edota legez ahalmena daukan pertsona bakarreko organoaren bitartez ordezkatuta dagoan ekitaldi eta ospakizunetan baino ez da ezarriko araudi hau.

II. TITULUA**EKITALDI PUBLIKOAK****I. KAPITULUA****EKITALDI OFIZIALAK****2. artikulua**

1. Araudi honen ondorioetarako, ekitaldi publikoak, ofizialak edota pribatuak izango dira.

2. Ekitaldi ofizialak, Udalak edo estatu, autonomia edo foru administrazinoko beste edozein organok antolatzen dauzenak izango dira eta bestalde, pribatuak, izaera hori daukien erakundeek antolatutakoak.

II. KAPITULUA**LEHENTASUNEN HURRENKEREA****3. artikulua**

1. Ekintza ofizialetan, orokorrean, ondorengo lehentasunen hurrenkerea jarraituko da:

- a) EAeko Lehendakaria.
- b) Alkatea.
- c) Lehendakariordeak.
- d) Eusko Legebiltzarreko presidentea.
- e) Auzitegi Goreneko presidentea.
- f) Bizkaiko Diputatu Nagusia.
- g) Arartekoa.
- h) Kontu Auzitegiko presidentea.
- i) Eusko Jaurlaritzako kontseilariak.
- j) Foru diputatuak.



- k) Alkateordeak, izendapenaren hurrenkerearen arabera.
- l) Tokiko Gobernuak kideak diran zinegotziak.
- m) Gainontzeko zinegotziak zaharretik gazteenera.
- n) Auzoetako alkateak. Auzoen izenen ordena alfabetikoan, haren esparruetatik kanpo egiten diran ekintzetan. Auzo bakoitzean egiten diranetan, bere lekua Uriko alkatearen hurrengo izango da.
- o) Bake epailea.
- p) Udaleko idazkari nagusia.

2. Ekitaldiko hurrenkeran, EAEko lehendakariak parte hartu ezker, Alkatea baino lehenago joango da beti. Bardina gertatuko da gainerako kargudunekin euren aurrekoak agertzen ez badira.

4. artikulua

Aurreko artikuluan aitatutako hurrenkerea karguaren titularrak diranentzat da eta kasu-kasu, beherago dagoan hurrengo karguentzat, haren ordezkari aurkezteko eskuorde-tza emon badeutsie aurrekoek. Arestian aitatutakoak baino beheragoko maileak daukien ordezkariak ez da onartuko.

III. KAPITULUA EKITALDI PRIBATUAK

5. artikulua

1. Beste erakunde ofizial batzuek antolatutako ekitaldietan baita pribatuetan be, Alkateak, zeinek Makila erango dau, lehendakariak daukanaren hurrengo lekua hartuko dau eta bere eskoian kokatuko da. Gainontzeko gonbidatuei jagokenez, ekitaldia antolatu dabenean zehaztu dabezan hurrenkerak eta bestelako gorabeherak errespetatuko dira.

2. Halanda be, udalaren edota Udalarenak diran beste edozein egoitzatan egiten diran ekitaldietan, Alkatea egon ezker, bera izango da buru EAEko lehendakaria bertan dagoenean izan ezik, eta orduan 3. artikuluko azken paragrafoan xedatutakoa beteko da.

6. artikulua

Udalak antolaturikoak ez diran ekintza pribatu zein publikoetan Udaleko protokolo zerbitzuak erakunde antolatzailarekin koordinatuta jardungo dau, hurrenkerea ezarri eta kontuan euki beharreko ganerako xehetasunak zehazteko, ekitaldia behar dan moduan egin daiten.

7. artikulua

1. Omenaldi, esker on edo ohorezko izendapena emoteko ekitaldi pribatuetan, omendutako pertsonak ekitaldiaren buru danaren hurrenkerearen ondorengo lekua hartu ezker, Alkatea haren ezkerrean kokatuko da.

2. Ekitaldia ofiziala bada, omendutako pertsona alkatearen eskoian kokatuko da, eta 3. artikuluan ezarritako hurrenkeran postu bat aldatuko da, nahiz eta ekintza 5. artikuluan aitatutako forma batean zein bestean izan.

III. TITULUA PROTOKOLOA

I. KAPITULUA

EKITALDI OFIZIALETAN UDALBATZAREN PARTE HARTZEA

8. artikulua

Udala Udaltzaren lez eratuko da araudi honetan agertzen diran ekitaldi eta ospakizunetara joateko eta bertan parte hartzeko, baita Alkatetzak, Bozeramaileen Batzordeagaz



batzartu ondoren eta Protokolo buruaren aholkularitzaz erabagiten dauan beste edozein kasutan be.

9. artikulua

Udalbatza, ekintza konkretu batera badoa aurreko artikuluan aitaturako moduan, ondorengo arauak kontuan hartu beharko dira:

1. Ezarritako orduan eta Araudi honetan edo bereziki kasu bakoitxerako zehazten diran janzkera eta ezaugarriekaz, udalkide guztiak eta idazkari nagusia kasu bakoitzean aginduriko lekuan bertaratuko dira, adierazten dan lez paratuz:
 - a) Aurrekaldean, Alkatea, bere eskoian lehen Alkateordea, eta bere ezkerrean, Sindikoa.
 - b) Honeen ondoan, eskoi-ezkerretara txandakatuta, beste Alkateordeak edota Tokiko Gobernuako kideak.
 - c) Honeen atzekaldean, beste zinegotzi guztiak, zaharrenetik gazteenetara, eskoitik hasita, Idazkari Nagusiak ezkerretaranengo lekua hartuz.
 - d) Holan egongo dira txistularien bandeak Alkate Soinuia jo arte, arautegi honen 1. eranskinean agertzen dan moduan.
2. Prozesino zibikorako segizinoa Euskal Herrian ohikoa dan ordenan antolatuko da, ilara bitan, Uriko Estandartea daroan Sindikoa buru dala, bere ezkerrean idazkari nagusia, eta eskoian zinegotzi gazteena dauzala. Horreen atzetik, al-dizka eta ilara bitan, ganerako zinegotziak joango dira, adinaren arabera, eta azkenean Udal Gobernuia eta Alkate udalburua 2. eranskinak adierazten dauan modura.
3. Salbuespenez, Alkateak begirunea eta adeitasuna adierazoteko berariaz gonbidatu badau, Udalbatzakoa ez dan pertsonaren batek parte hartu ahal izango dau segizinoan Alkatearen eskoian jarriz. Halan danean, Alkateak bere lekua itxi eta atzeko ilara baten jarriko da, 3. eranskinean agertzen dan lez.
4. Aitaturako pertsonaz gain, beste inork ezingo dau segizinoan parte hartu ezta bertan egon be, araudi honetan jartzen diran salbuespenak izan ezean.
5. Segizinoan partaideak une oro isilik, begirunez eta seriotasunez egon beharko dira.
6. Udaltzaingoak babestuko dau segizinoa, kasu bakoitxean zehaztuko dan udaltzain kopuruagaz.
7. Segizinoa laguntzen doazen jai-giro, musika, dantza eta abarreko taldeak, haren aurretik joango dira beti eta, ez honeetako kideek, ezta beste inork be, ezingo dabe inondik inora segizinoa oztopatu ezta trabarik egin behar dan moduko ordena eta seriotasunez igaro daiten.

10. artikulua

1. Edozein kasutan be, Udaltzaingoari jagoko segizinoaren kalejirea jagotea normaltasun osoz joan daiten herriko kaleetatik.
2. Beste zerbait erabagi ezean, ekintzea burutu ondoren Udaltzaingoa arduratuko da Uriko Estandarteaz eta, behar bada, Makilaz be, ahalik eta arinen udaletxera eroateko.

II. KAPITULUA JANZKERA

11. artikulua

Araudi honek arautzen dauzan ekitaldi ofizialetara joateko, udalkideen janzkera kasu bakoitxerako bertan zehazten dana izango da. Beste kasu guztietan, Alkatetzak erabagiten dauena egingo da.

**12. artikulua**

Arau orokor legez, informal dotorea izango da.

13. artikulua

1. Aurreko artikuluan ezarritakoaren ordez, Madalen, San Juan Degoilatua, Andra Mari eta Santa Eufemia jaietako ekintzetara joateko janzkerea ondorengo izango da: botoi balzdun mahoizko alkondara mangaluzea eta mahoizko frakak edo gonea gerriko zuriagaz, eta Bermeoko armarridun zapia idunean. Oinetakoak zapata ilunak izango dira, baina Madalen eta San Juan Degoilatu egunetan, kirol-oinetakoak eroan ahal izango dira.

2. Udala Udalbatza lez antolatuten danean, zinegotziek ezingo dabe bere erropean agertu ezelako sigla, ikur, lelo, kontsigna edo antzekorik, udal-sinboloak ezean.

14. artikulua

Aurreko artikuluetan ezarritakoa Udaleko Idazkari Nagusiarentzat be aplikagarria izango da.

III. KAPITULUA**IKURRAK****1. ATALA****MAKILA****15. artikulua**

1. Makila Justiziaren irudia da, eta herritar guztiak tratamendu bera izango dabela, pribilegiarik izan barik, adierazoten dau. Uriko Alkateak bakarrik eroan ahal izango dau udalerrri osoan. Auzoetako alkateek be makila eroan ahal izango dabe, baina euren auzoen barrutian baino ez.

2. Uriko Alkateak, udalean dagozan makilen artetik, berak legealdiaren hasieran aukeratutako makila erabiliko dau legealdi osoko protokolo egunetan.

3. Auzoetako alkateen makilburuak eta txurroak zidar kolorekoak izango dira, eta lehenengoaren ganean auzoaren izena eta Bermeo berbak izango dabez grabatuta.

16. artikulua

1. Uriko Alkate barria aukeratzeko egiten dan ekitaldi edo bilkuran, kargua ixten dauenak leku berezia izango dau areto nagusian, eta makilea emongo deutso Alkate barriari.

2. Alkatea berriro hautatua izanik, mahaiburua dan zinegotziak emongo deutso makilea.

17. artikulua

1. Ezelan be ez, ezta adeitasun edo hierarkia arrazoiengaitik be, itxiko deutso Alkateak makila inongo agintariari.

2. Auzoetako alkateek Uriko alkateari bakarrik itxiko deutsie Makila honek zehaztuten dauzan kasuetan edo araudi honek azpimarratzen dauzan ganerakoetan.

18. artikulua

1. Behin izendatu ondoren, Auzo-alkateek Uriko Alkatearengandik hartuko dabez makilak ekitaldi publiko batean.

2. Makila Auzo-alkateen esku egongo da agintaldi osoan; hau amaitzen danean, eta euren ordezkoak izendatzeko ekitaldian, aurreko paragrafoan ezarritako moduan emongo deutsie makila.



2. ATALA

UDALBATZAKO INTSIGNIA**19. artikulua**

Bermeoko udalbatzak ez dauka intsigniarik.

3. ATALA

URIKO ESTANDARTEA**20. artikulua**

Uriko Estandartea, armariagaz batera, udalerriko intsignia nagusia da, eta historia, aginpidea eta handitasuna adierazoten dauz, eta han non agertzen dan Bermeo Uriko legezko agintarien presentzia adierazoten dau.

21. artikulua

Uriko Estandartea Udala Udalbatza lez osotzen danean baino ez da erabiliko, desfileetan segizinoaren aurretik joanez, eta Sindikoak eroango dau 1792ko masteagaz arautegi honetako 9-1 eta 9-2 artikuluetan ezarri dan moduan, eta ezin izango da bertan adierazita ez dagozan beste helburu batzuetarako erabili.

22. artikulua

1. Uriko Estandartea material noblezko eta karmin-koloreko ohialez egina izango da. Urre-koloreko flekodun hiruki zuzenaren itxurea izango dau; lekagunea edo kateto txikia 122 cm-koa izango dau, eta 182 cm-ko jalgigune edo kateto nagusia; hipotenusa konkortu konbexua izango da eta jalgiguneko erpinean urre koloreko borla bat eukiko dau.

2. Erdigunean Uriko armari heraldikoa eroango dau bordaturik, triangeluaren alde txikiaren paraleloan daukala ezkuduaren burua, eta haretx hosto eta ezkurrekaz orlaturik agertuko da. Armariaren inguruan Bermeoko Udala inskripzioa agertuko da urre kolorez.

3. Mastaren goreneko muturretik, gorri, zuri eta berde koloreko hiru zinta egongo dira zintzilik.

23. artikulua

Uriko Estandartea ekitaldiren batera eroaten danean, leku nabari eta ikusteko modukoan jarriko da.

24. artikulua

1. Uriko Estandartea eroan eta zaintzeko ahalmena Sindikoari jagoko, eta ardura hori zinegotzi gazteenak hartuko dau, eta haren ordezkoa hurrengo gazteena izango da.

2. Kargu hori Toki Erakundeetako Antolaketa, Jarduera eta Araubide Juridikoaren Erregelamenduaren 38. artikulua aitutzen dauan udalaren ez ohiko osoko bilkuran behin izendatua izan ondoren, Alkatetzeak igorriko dauen dokumentu artistiko baten islatuko dan adeitasun eta ohorezko adierazgarria izango da.

25. artikulua

Uriko Estandartea edota Makila eroaten dan ekitaldi bat amaitzen danean eta Udalbatzak ez badau udaletxera itzuli behar, Udaltzaingoak hartuko dau hareen ardurea, eta ahalik eta arinen eroango dauz udaletxera.

4. ATALA

URIKO ARMARRIA**26. artikulua**

Armarria, Uriko Estandarteagaz batera, Uriko sinbolorik nagusia da, eta horregaitik, behar besteko errespetua zor jako.

**27. artikulua**

1. Bermeoko Armariak honako ezaugarri honeek daukaz:

Urrezkoa da, eskoian, sablezko bale ontzia eta lau arraunlari dagoz abantean eta brankaganean zutunik dagoan arpoilariak arpoia jaurtitzen deutso sablezko zeroi bati, eskoian berau be, eta guztiak zidar eta urdin koloreetako olatuen ganean. Goiburua, faja, eskoirantz doazen sablezko otso bi dagoz, eta gane-ganean bizardun buru bat. Azpa gorria dau, eta bertan sablezko letrakaz idatzita Stemma proderi in Primis Bermei legenda agertzen da.

2. Uriko Armarrria erabiltearen eta berregitearen inguruan, Bermeoko Uri txit Argi eta txit Leialaren armarrria erabilteko arauak ipinten dauzan udal ordenantzeak ezarritakoa bete beharko da.

5. ATALA

BERMEOKO BANDEREA**28. artikulua**

Bermeoko Banderea lauki zuzena izango da; 1:2 proportzinokoa, hau da, jalgiguneko unitate bi edukiko dauz lekaguneko unitate bakoitxeko.

Bertikalean erdibitua izango da, mastaren aldeko erdia gorria (PANTONE 186C) iza-nik, eta eraginaren aldekoa zuria.

29. artikulua

Bermeoko Banderea jasoko da, bakarrik edo beste baten ondoan, udaletxean zein Udalaren eta Udal erakundeen jabegodun eraikinetan, baita jagokon erabagietan agin-tzen diran lekuetan be.

30. artikulua

Bermeoko Banderea, maila goreneko beste baten ondoan agertzen dan kasuetan, haren ezker aldean (ikuslearen eskuinaldean) jasoko da. Eta masta zutun edo gurutzatuetan be, holan ipiniko da.

31. artikulua

Udalak aginduriko dolu egunetan, Bermeoko Banderea, bai udaletxe aurrean zein udalaren edozein eraikinetan jasota dagozan beste guztiak be, masta erdian jasoko dira. Modu horretara jarri ezin dan lekuetan, triza lotzen dan lekuan ipiniko jako krespoi baltza.

32. artikulua

Bermeoko Banderea bermeotar guztiek erabili ahal izango dabe eta erabili behar dabe ordezkatzan dauzan ikur legez, baina ezingo jako inoz enpresa, alderdi politiko, sindikatu, alkarte edo bestelako erakundeen hizki, marka edo logotiporik ganean erantsi.

33. artikulua

Bermeoko Udalbatzak herriko ohiturak mantenduko dauz. Honetarako, egun zeremo-nialetan Uriko estandarte eta Alkatearen makila erabiliko dira, kasuan kasu. Baina inoiz Uriko ikurrak diran honeek inoiz ez dira sartuko gunee erlijiosoetara.

**IV. TITULUA
ZEREMONIAK****I. KAPITULUA
SAN PEDRO EGUNA «ARRANTZALEEN KOFRADIAREN EGUNA»****34. artikulua**

Udala, ohikoa danez, Arrantzaleen Kofradiaren gonbidapena onartuz, 9. eta 10. artikuluetan ezarritakoaren arabera eta 12. artikuluan agertzen diran jantziekaz, ekainaren 29an Arrantzaleen Kofradiako presidentea eta Zuzendaritza Batzordea agurtzera joango da goiko Plazan Udalbatza osotuz, gonbidapenean agertzen dan lekura.

35. artikulua

Segizinoaren aurretik Txistularien Bandea joango da eta Bermeo Urikoa dan San Pedro Zortzikoa joko dabe.

36. artikulua

1. Kofradikoekaz alkartu ondoren, prozesinoa hasiko da, Arrantzaleen kofradiak prozesinorako gonbidapena egiten badau. Horren buru zibila izango dan alkatearen eskoiatara Arrantzaleen Kofradiako presidentea joango da araudi honetako 9.3. artikulua arautzen dauan legez, 4. eranskinean adierazten danaren arabera.

2. Segizinoaren aurretik Txistularien Bandea joango da, eta esaten jakon lekuetan Bermeo Urikoa dan San Pedro Zortzikoa joko dabe.

3. Prozesioa amaitu ondoren, segizioa desegingo da, alkatearen makila eta uriko estandarte Udaltzaingoaren esku geratuko dirala.

**II. KAPITULUA
MADALEN EGUNA «IZAROREN EGUNA»****37. artikulua**

1. Urtero, garagarrilaren 22an, Madalen Egunean Udalak antxina-antxinatik egin ohi dauen lez, Uriak Izaro islearen ipar-ekialderantz dauzan mugak adierazoko dauz, araudi honetan ezarten dan arabera.

2. Ekitaldi hori urteren baten ez ospatzeak, edozein dala zergaitia, ez dau esan gura muga horreek galdu edo-ta murriztuko diranik, ezta uriak hurrengo urteetan muga horreek adierazoteko eskubidea galduko dauenik be.

38. artikulua

1. Egun horretan, udalbatza, 9. eta 10. artikuluan ezartzen dan moduan eta 13. artikuluan agertzen diran jantziekaz, Goiko plazan, udaletxe aurrean batuko da eta Santa Eufemia eleiza aurrera joango da. Hemen, segizioa desegingo da denpora batez, udalbatzeko kideek elizkizunean parte hartzeko aukera izan daien. Honen ostean, segizioa desegin dan puntu berberan berriz udalbatza batuko da itsasoratzeko lekura segizioan jarraitzeko. Udaletxetik eleizarainoko ibilbidean zein eleiza aurretik itsasontziraingo tartean Txistularien Bandea joango da segizinoaren aurretik, eta Bermeo Urikoa dan Madalenaren Zortzikoa joko dau.

2. Alkateak makila eroango dau eta segizinoaren aurretik Uriko Estandarte joango da.

3. Segizioa mozten dan unean eta enbarkatzeko momentuan ere makila eta Uriko Estandarte Udaltzaingoaren ardurapean geratuko dira eta arratsaldera arte jagongo dauz bere egoitzan.

**39. artikulua**

1. Udalbatza doan itsasontzi ofizialean, Euskal Herriko Ikurrina ezezik, Uriko Estandartearen ordezeko Udal Banderatxoa eta Bermeoko banderea be jasoko dira trinketpaloan edo aurreranzkoenean.

2. Banderatxoa karmin kolore gorri ilunekoa izango da, 1:1 proportzinokoa, eta erdigunean, alde bietatik, uriko armak eukiko dauz; armak banderatxoaren altueraren erdia, eta jagoken zabalerea izango dabe baina kanpoko apaingarri barik.

3 Edozein arrazoiengaitik Alkateak beste itsasontzi bat hartu behar badau, Udal Banderatxoa beti izauko da ha ontziratzen dan beste edozein itsasontzitan.

40. artikulua

Alkatea ontziratuta doan itsasontziari egiten jakozan ziabogak libreak eta borondatezkoak izango dira, eta egiten dabezan patroien ardurapean egingo dira. Patroiek ahalik eta segurtasun neurri handienak hartu beharko dabez maniobretan arrisku mota danak ekiditeko, eta eurak izango dira modu zuzen eta pertsonalean ekitaldi horretan gertatu daitekezan kalte eta galeren erantzuleak.

41. artikulua

1. Itsasontzia Izaroren inguruetara heltzen danean, orekan ipiniko da ugarte ganean Bermeoko Banderea eta Ikurriña jarri eta eurak jaso dabezan pertsonak itsasontzira itzuli arte.

2. Ondoren, teila botatzearen ekintzea egingo da, horretarako, ondokoa izango da kontuan:

- a) Itsasontzia Izaro islearen paraleloan jarriko da kanpoko aldetik, honen ipar-ekialdean, eta brankea Elantxobera begira dauela.
- b) Alkateak, baborrean kokaturik, teila esku biekaz hartuko dau eta itsasora jaurtiko dau indarrez, bere buruaren ganetik, ondorengo hitzak esanez: Horraino heltzen dira Bermeoko itzuinak.
- c) Inork ezin izango deutso alkateari lagundu teilea botaten, eta ezin izango dau ekintza hori beste inogaz banatu.
- d) Arabiar motako teilea erabiliko da, kurbatua eta gorria, eta erabilitakoa izan beharko dau. Itsas-ibilaldiaren bitartean eta itsasora bota artean, itsasontzian ikusteko moduko toki nabarian itxiko da teilea.

3. Teilea bota eta gero, Txistularien Bandeak Madalenaren Zortzikoa joko dau, eta hori amaitzean udaleko idazkariak aktea formalizatuko dau.

4. Ekintzea egiaztatuko dauan idazkaria eta alkateak ezezik, beste zinegotziek, itsasontziko patroiak eta, eskatzen bajake, itsasontzian bertan ekintzan parte hartu daben beste agintari eta pertsonak be sinatuko dabe Aktea.

5. Madaleneko aktak udalaren edo idazkariaren ardura eta erantzukizunpean gordeko dira eta bost urterik behin koadernatu egingo dira eta udalbatzako akten erregimen juridiko bardina izango dabe.

42. artikulua

1. Jai honen Oinarrizko ekitaldiak diranak (Banderak isla ganean izau, teilea bota eta aktea sinatu) egin dirala egiaztatu ostean, eta ahal dan guztietan, ondoko Elantxobe eta Mundaka eleizateak bisitatuko dira, adeitasuna, laguntasuna eta alkarren ondoan dagozan herrien arteko asmo ona adierazoteko. Mundakara sartzeko enbarkazioan leku nahikorik ez badau udalbatza udal idazkaririk gabe joango da.

2. Kasu bakotxean bisitaten dan herriko alkateak Bermeoko alkatea hartuko dau moila ganean, eta bere makilea emongo deutso, Euskal Herrian ohiturea dan moduan, eta gero ohorezko aurrekua eskeiniko deutso.

**43. artikulua**

1. Ekitaldia bisitatutako herriko beste toki baten egiten danean, segizinoan egingo dira moilatik eta moilaranzko ibilbideak, eta segizinoaren buruan Txistularien Bandeak Madalenaren Zortzikoa joko dau.
2. Bermeoko alkatea herriotan dagoen denboran, makilagaz ibiliko da uneoro.
3. Bisitaldiaren ostean, eta itsasoratu baino lehen, Bermeoko alkateak makila itzuliko deutso harrerea egin deutson alkateari, eta itzulerako bidaiari ekingo deutso.

44. artikulua

Udalbatza Bermeora heltzerakoan, eta moileratzen dan lekuan bertan, honela antolatuko da:

1. Alkateak makilea eroango dau eta Uriko Estandarte ez da eroango.
2. Bermeoko alkatea izango da buru, Elantxobeko eta Mundakako alkateak, balegoz, aldamenean daukazala eta beste agintariek eta gonbidatuek lagunduta, 5. eranskinean ezarritako hurrenkerearen arabera.
3. Jarraian, segizinoak, bere aurrean jarriko diran eta Madalenaren Zortzikoa joko daben Txistulari Banda eta Musika Bandez lagunduta, Udaletxerako bidea hartuko dau. Ibilaldi horren bidea urtero aldatu leiteke.

45. artikulua

Udaletxera itzulita, alkateak makilea Udaltzaingoari itzi eta Udalbatzako kideekaz batera, Ikurrina eta Bermeoko Banderea jasoko dauz, eta holan herriko jaia hasiko da plazan. Jarraian, alkatea, zinegotziak eta udal idazkaria, danak alkarregaz, lehen biribilketearen buru izango dira plazan, eta honegaz amaituko dira Madalenaren ekitaldi ofizialak, baina jai egitarauko beste ekitaldiek jarraituko dabe, bai plazan bertan bai herriko beste toki batzuetan.

III. KAPITULUA

SAN JUAN DEGOILATUA «GAZTELUGATXEREN EGUNA»**46. artikulua**

Urteroko abuztuaren 29an, San Juan Batistaren degoilazioaren jaia, Bermeoko Udalak, antxinatik datorren tradizioari jarraituz, Gaztelugatxeko San Juan Ermitako instalazio eta tresnak ikuskatuko dauz bisitaldia eginez Gaztelugatxeko islara.

47. artikulua

Ekintza hori ondorengo arauen arabera beteko da:

1. Udalbatza goizean batuko da, 9. artikuluan azaldutako eran, eta 13. artikuluan aipatutakoaren arabera jantzita egon beharko dira udalkideak.
2. Segizinoak, Txistulari Bandearen laguntzeaz, Udaletxe aurrean hasiko dau bere ibilaldia, Nardiz tar Jon eta Arresi kaleetatik jarraituz, San Juan Portalera heldu arte.
3. Azken leku horretara heldu aurretik, segizinoa une batez geldituko da Nekazari kalearen aurrean, lehen Beien Portale zanean, nondik antxina urtetan eban Udalbatzak egun horretan Gaztelugatxera joateko.
4. Txistulari Bandeak Bermeo Uriko propioa dan San Juan Zortzikoa bakarrik joko dau ibilaldian.
5. Segizinoa San Juan Portalearen aurrean bananduko da, eta udalkideak Gaztelugatxera joango dira aurretik erabagitako moduan eta bideetatik.
6. Udaltzaingoa arduratuko da makilea eta uriko estandarteaz, eta haren ardura-pean geratuko dira Udalbatza itzuli arte.

**48. artikulua**

Udalbatza Gaztelugatxe ganera heltzean eta eskilararen azken harmailan Arane-Gibelortzaga Auzo-alkatearen ongi etorria hartuko dau. Auzo-alkatea udalkideak legez jantzita egongo da, eta Uriko Alkatea agurtu ondoren, bere makilea emongo deutso.

49. artikulua

Udalaren presentzia adierazteko Udal Banderatxoa jasoko da Ikurrinaren ondoan.

50. artikulua

- a) Ermita aurrean, alkateak ondorengo eskakizuna egingo dau:
Antxinatik datorren ohitureari jarraituz, santutegi honen inguruaren mantenurako erabilten diran gauzen kopurua eta egoerea azaldu egin deustazuz.
- b) Gaztelugatxe Elkarteko kide batek modu labur eta zehatzean erantzungo deutso galdereari, eta ondoren, Alkateak ermitako kanpaia hiru bider joko dau.

51. artikulua

- a) Jarraian, Udalbatza eskilararen ondora hurbilduko da eta alkateak Bermeoko bandera izauko dau, udal banderatxo eta ikurrinaren ondoan, eta udaleko idazkariak alkateak egindako eskaeraren eta Gaztelugatxe Elkarteko kide batek emondako erantzunaren aktea egingo dau, eta akta hori jendaurrean irakurriko dau.
- b) Aktea lehenengo alkateak sinatuko dau, gero Gaztelugatxe Elkarteko kideak, auzo-alkateak, zinegotziek eta azkenik idazkariak. Beste inork ezin izango dau aktea sinatu.

52. artikulua

Akta honeek kontserbatzeko eta zaintzeko erregimena araudi honetako 41.5 artikuluan aipatzen dan modukoa izango da.

IV. KAPITULUA

ANDRA MARI EGUNA «ALMIKAKO EGUNA»**53. artikulua**

Udala, ohiturea danez, irailaren 8an, Almika auzora joango da udalbatza osotuz.

54. artikulua

Almikarako ibilaldia hasi baino lehen, 9.1. artikuluan agertzen dan moduan batuko da Korporazioa Goiko plazan, udaletxe aurrean, eta bere kide guztiak 13. artikuluan arabera jantzita.

55. artikulua

- a) Jarraian, 9.2 artikuluan ezarri dan moduan eratuko da korporazioa, eta aurretik finkatutako ibilbidearen arabera, Askatasun Bidea, Ander Deuna, Artike eta Erreñezubi kaleen alkarguneraino joango da, eta bertan, 9.1 artikuluan agertzen dan moduan Alkate Soinuaren agurra barrero entzun ondoren, Korporazioa desegingo da eta aurreikusitako moduan igongo dabe Almikara.
- b) Urtero ibilaldi barria egiten saiatuko da, Udaletxetik hasita artikuluan honetan azaldutako lekura arte. Ibilbidea zinegotziek proposatu leikie, edo Jai Batzordekideren batek eta erabakia Herritar Batzordetik bideratuko litzateke.
- c) Udaltzaingoa arduratuko da alkatearen makilaz eta uriko estantarteaz, barrero be estandarte Almika auzora igo beharko daualarik.

56. artikulua

1. Eleiz ospakizuna bukatu ondoren, eleiza aurrean Udalbatza osotuko da barrero.



2. Auzo-alkatea segizinoaren zain egongo da, udalkideak legez jantzita, eta Uriko Alkateari bere makilea emongo deutso eta zelaira zuzenduko dira segizioan.

57. artikulua

Harrera ekitaldia amaituta, dantzari eta txistulari taldeek Aurrekua eskeiniko deusie udal korporazioari, eta horretarako Udalbatzea holan jarriko da:

1. Ohorezko lekuan, Alkatea.
2. Bere eskoian Almika auzoko alkatea, eta ezkerrean, Uriko Estandartearen erdian Sindikoa.
3. Horreen atzean, Udal Gobernuaren kideak eta ganerako zinegotziak adinaren arabera ordenan jarrita eta, azkenean, idazkari nagusia (6. eranskina).

58. artikulua

Dantzariak gonbidatuta, udalkideek aurrekuan parte hartu ahal izango dabe.

59. artikulua

Aurrekua amaitzean, Uriko Alkateak makila itzuliko deutso Auzo-alkateari, eta segizinoa bananduko da. Udaltzaingoa estandarreaz arduratuko da.

V. KAPITULUA**SANTA EUFEMIA EGUNA****60. artikulua**

1. Irailaren 16an, Udala, udalbatza osotuz, 9. eta 10. artikuluan ezartzen diren moduan eta 13. artikuluan agertzen diren jantziek, Goiko plazan, udaletxe aurrean batuko da eta Santa Eufemia eleiza aurrera joango da. Udalbatzaren segizinoaren aurretik Auzo-alkateak joango dira, besteak lez jantzita eta euren makilek, ilara bitan antolatuta eurek ordezkatzeko dabezan auzoen izenen arabera, eskoialdeko lehena Agirre izanik, ezkerrekoa Almika eta honela Arana-Gibelortzaga, Artika, Arranotegi, Demiku, Mañu, San Andres eta San Migel.

2. Santa Eufemia aurrean, segizinoa desegingo da.
3. Udaletxetik egiten diren ibilbidean Txistularien Bandea joango da segizinoaren aurretik.
4. Alkateak makila erango dau eta segizinoaren aurretik Uriko Estandartearen joango da.
5. Segizinoa moztu behar denean eta amaieran Makila eta Uriko Estandartearen Udaltzaingoa ardurapean geratuko dira eta udaletxera bueltatuko daz.

61. artikulua

Elizkizunaren ostean, segizinoa batuko da eta Eupeme Deuna enparantzara heldu ostean Txistularien Bandea Alkate Soinuaren joko dau. Horretarako udalbatzea 9.1 artikulua ezarritako eran jarriko da, eta jarraian Alkatea, Zinegotziak eta Idazkariak dantzaldia zabalduko dabe, eta hau amaitzean segizinoa banandu egingo da.

VI. KAPITULUA**BESTE OSPAKIZUN BATZUK****62. artikulua**

Auzuneetan jaiak ospatzen direnean, uriko alkatea auzune horreetan ohituraz egiten diren ekitaldietara joango da, auzo alkateak lagunduta eta, haren uriko alkatea agurtuko dau bertara heltzean, eta makilea emongo deutso.

**V. TITULUA
OHOREAK ETA SARIAK****63. artikulua**

Bermeoko Udalak ohoreak eta sariak banatu daitez, kultura, kirol, zientzia, arte, gizarte edo ekonomia mailako aparteko merezimenduak, zerbitzu nabarmenak, lan balio-tsua eta aparteko ekarpenak saritzeko, zertarako-eta Bermeoren eta gizartearen ospea eta handitasuna areagotzeko asmoz.

64. artikulua

Honeexek dira Bermeoko Udalak emon daitezkan ohoreak eta sariak, lehentasun ordenearen arabera:

1. Bermeoko Seme/Alaba kutuna izendatzea.
2. Bermeoko Semetzakoa/Alabatzakoa izendatzea.
3. Bermeoko Urrezko Dominea.
4. Bermeoko Zidarrezko Dominea.

65. artikulua

Titulu honetako prozedura, sari-emote, erregistratze eta generakoetan, ohoreak eta sariak emoteko udal ordenantzan ezarritakoa bete beharko da.

**VI. TITULUA
ALKATE ETA ZINEGOTZIEN HERIOTZETAKOAK****66. artikulua**

Alkatearen heriotza kasuan arau honeek jarraitu beharko dira:

1. Udalaren izenean eskelea ipiniko da egoki ikusten den egunkarietan.
2. Udaletxeko aurreko eta beste udal-eraikinetako banderak masta erdira bajatu edo lutoz jantziko dira hiletaren hurrengo egunera arte.
3. Udalaren izenean lore-koroa edo sorta bat enkargatuko da.

67. artikulua

Zinegotziren baten heriotzaren kasuan, 66. artikuluan agertzen diran arau bardinak jarraituko dira.

68. artikulua

Alkate-ohiren baten heriotzaren kasuan, 67. artikuluan agertzen diran arau bardinak jarraituko dira.

69. artikulua

Zinegotzi-ohiren baten heriotzaren kasuan Udaletxe aurreko banderak masta erdira bajatuko dira, luto-seinale, hiletaren hurrengo egunera arte.

70. artikulua

Indarreko legealdiko Alkatearen zein Zinegotzien guraso, bikotekide edota seme-ala-baren bat hil ezker, Udalaren izenean lore-koroa edo sorta bat enkargatuko da.

71. artikulua

Aitatutako edozein kasu gertatu ezker, indarreko legealdiko alkateari eta zinegotziei barri emongo jake ahal dan arinen, hiletan parte hartu daien.

**XEDAPEN GEHIGARRIA**

Protokoloburua udaleko Osoko Bilkuran izendatutako Kulturako zinegotzi ordezkaria izango da. Edozelan be, kargua ohorezkoa eta dohainekoa izango da.

AZKEN XEDAPENA

Araudi hau Bizkaiko Aldizkari Ofizialean argitaratzen danetik hamabost eguneko epean jarriko da indarrean.

Bermeon, 2020ko azaroaren 5ean.—Alkatea, Aritz Abaroa Cantuariense



1. ERANSKINA

9.1 artikulua

Zin. nagusia	2	3	4	5	6	7	8	9	10	Idaz. Nag.
5. Ao edo TGBeko kidea			3. Ao	1. Ao	Alk.	Sind.	2. Ao	4. Ao		



2. ERANSKINA

9.2 artikulua

1. Ao	Alkatea	2. Ao
3. Ao		4. Ao
5. Ao edo TGBeko kidea		Zin. nagusia
2		3
4		5
6		7
8		9
10	Sindikoa	Idaz. Nag.

**3. ERANSKINA****9.3 artikulua**

Gonbidatua	Alkatea	Gonbidatua
1. Ao		2. Ao
3. Ao		4. Ao
5. Ao edo TGBeko kidea		Zin. nagusia
2		3
4		5
6		7
8		9
10	Sindikoa	Idaz. Nag.



4. ERANSKINA

Gonbidatuak		
10	Sindikoa	Idaz. Nag.
8		9
6		7
4		5
2		3
5. Ao edo TGBeko kidea		Zin. nagusia
3. Ao		4. Ao
1. Ao		2. Ao
Kofradiako Presidentea		Alkatea



5. ERANSKINA

Gonbidatuak		
10	Síndico	Idaz. Nag.
8		9
6		7
4		5
2		3
5. Ao edo TGBeko kidea		Zin. nagusia
3. Ao		4. Ao
1. Ao		2. Ao
Elantxobeko alk.	Alkatea	Mundakako alk.



6. ERANSKINA

Zin. nagusia	2	3	4	5	6	7	8	9	10	Idaz. Nag.
	5. Ao edo TGBeko kidea	3. Ao	1. Ao	Almikako AA	Alkatea	Sindikoa	2. Ao	4.Ao		